

Regio.
Soli fertilitas.
Imperium Ma-
jorum.

Vrbes & Opida.

Vicentiae Dicitio sequitur, cuius Ager ut amœnissimus: ita Vini, Frugum, aliarumque rerum fertilissimus: præcipue Mororum, quorum frondibus Bombyces aluntur. Haud procul Vrbe duæ nobiles Lapidicina, in Monte, qui *Cornelius* Latinis, vulgo *Covelo*. Sunt & Marmorum in *Valdano* vico. Vrbs ab *Tusciis*, vel, ut scribit *Trogus*, ab *Gallis* condita, sequenti ævo in fide diu stetit *Populi Romani*, usque ad *Attilæ* tempora, a quo vastata, post in *Gothorum*: inde in *Langbardorum*, postremo in *Italia Regum* fuit potestate. Ijs pulsus, libertate sua sub auctoritate *Imperij Romani* est usa, usque ad *Frederici I I* Imp. principatum, a quo direpta cremataque varios habuit Dominos, *Carrarienses* Patavinos, *Scaligeros* Veronenses, *Galeatios* Mediolanenses: *Venetos*. Tandem *Maximiliani I* Imperatoris armis infestata, eiusque fidei subiecta, *Venetis* ad extremum est reddita. Vrbs ipsa *Trogo*, *Pomponio*, *Tacito*, alijsque dicitur *Vicentia*. *Vicetia* *Plin.* & *Antonino*: *Bisetia* & *Bitetia* *Æliano*, *Ovinetia*, *Ptolemæo*: vulgo *Vicenxa*. Sita juxta radices collis, duobus amnibus, qui navigabiles, *Rerone* & *Bachilione* inæqualiter divisa. Non usque adeo elegans & magna: sed populosa, rerumque omnium copia abundans. Quatuor ibi notatu digna, *Palatium* Prætoris magnificum: *Pons* unius *Arcus*; *Saxum* solidum *Aræ* majoris in *Ecclesia D. Laurentii*, stupendæ longitudinis: *Theatrum* denique, vulgo *L'Academia*. *Cænobium* ibidem *D. Coronæ*, ubi pulcherrima *Bibliotheca*. *Incolæ* ingenijs sunt vividi: ad litteras, militiam, mercaturam promptissimi, faciendæ rei perpetuo sudantes: splendide vivunt, honeste vestiuntur. *Episcopatus* gaudet dignitate. Porro in *Vicentinorum* ditione. *Opida* sunt *Marostica* celebre & divitiis affluens *Opidum*. *Brendulum* divitiis, nobilitate ac frequentia nobile: *Lenicum* cum opibus & multitudine, ac nobilitate, tum amplitudine, multis *Italia Civitatibus* par. Est & sexto supra *Vicentiam* lapide, *Austrum* versus, pagus, & *Castellum Custodia*, quod ibi quondam noxij homines custodiri consuerint in vastis *Latumiis*, ad cadendos ædificiis faciundis lapides.

Patavij Dicitio.

Regio.
Situs.
Soli fertilitas.

Svpereft Ager Patavinus nobis in hac Tabula describendus. Hic apud *Bernardinū Scardeonium* describitur his terminis: *A meridie Athesis Fluvius* procurrit, a *Septentrione Muso* amnis parvus dilabitur: ab *Oriente æstuarium Venetiarum*: ab *Occidente* vero *Collēs* sunt *Euganei* & Ager *Vincentinus*. Patet omnis hic circuitus *CLXXX P. M.* in quo *Sexcenta & quadraginta septem Villæ* seu *Pagi*. Dicere solitus scribitur ab *Cælio Rhodigino* *Constantinus Palæologus*: nisi sciret a sanctissimis viris affirmari, in *Oriente Paradisum* esse, arbitrari se non alibi eum reperiri posse, quam in persuasi *Patavina amœnitate*. Ager *Frumenti*, variorum *Fructuum*, *Vini* etiam generosissimi ferax: unde *Martialis*: *Pictæque pampineis Euganea arva jugis*. *Venationibus* insuper, *Aucupijs* & *Piscationibus* frequens. Mirabilem rerum omnium copiam *Incolæ* triviali celebrant proverbio: *Bologna la grassa*.